

wir der rath — vnd alle vnnsere nachkomenden rethe den vnd die er denne by synem lebin zcu selewarten vnd vormunden gebeten vnd gekoren hat sulche — thonne heringis vnd tuch gewandis nū vnd ewiclichin vff die genanten tagezciiten ierlichin armen luten adder wo wir adder vnnsere nachkomenden rethe dirkennen das not sin wurde, von vnnsorme rathuse reichen vnde gebin —. Hirvmme zcu eynem ewigen gedechtnisse, so hat — Peter Irremberg vns — burgermeister ratmannen vnd alle vnnsern nachkomenden rethen zcu widderstatunge sechs schog groschin bereit wol zcu dancke vnd williclichin gegebin vnd bezalt, darumme denne wir vnd vnnsere nachkomenden rethe vmme vnnsere muhe willen eyn halp schog groschin der berurten muntze ewigis vnd ierlichis zcinses kouffen sullen, sulchen zcins denne wir vnd vnnsere nachkomendin rete an vnnsern eigen nutz vnd fromen wenden mogen —. Wir — burgermeister vnd ratmanne geswornne reden vnd globin —, das wir alle globe vnd artikele disses briefis — stete vnd gantz — halden sullen vnd wollen. Des zcu eynem warem bekentnisse vnde mehr sicherheid willen so habin wir vnnsere der stat groß ingesigil vnden an dissen offen brief wissentlichin lassin hengin. Gebin nach gots vnnsers hern gebort virtzenhundirt vnd dornoch in deme achtvndvirtzigsten iare am donrestage nach der heiligen drier konige tage.

Nach dem Schöffebuch I fol. 96 im Archiv des K. Bezirksgerichts zu Pirna.

No. 124. 1448. 20. Aug.

*Heinrich von Bünau auf Weesenstein gelobt, die Stadt Pirna in Betreff einer für ihn übernommenen Bürgerschaft schadloß zu halten.*

Ich Heinrich von Bunaw ritter zcum Weisensteyn gesessin bekenne —, das ich die ersamenn wiesen burgermeister ratmann vnde die gantze gemeyne der stat Pirne vor czwei hundert sochg schildichter groschin Friberger muntze, der y eyner funffzen hellir gilt, gein den vorsichtigen Nickel Herrn vorsatz habe, nemlich hundert sochg groschin uff den nestkomenden sinte Martins tag vnde hundert sochg uff sinte Johannis tag des teuffers vnnsers herren schirste dar nach volgene zu bezalene. Sulches gelobdes vnde vorsatzunge rede vnde globe ich gnanter Heinrich von Bunaw — die gnanten burgermeister ratmanne vnde die gantze gemeyne der stat Pirne nach lawte des hopt briues, den der gnante Nickel Herre von en darvor inne hat, gutlich an iren schaden zu entneme. Des zcu eim bekentnisse vnde mehr sicherheid habe ich — myn ingesigil — vndene an dissin uffin bryff lassin hengen, der da gegeben ist nach Cristi geburt tusent vierhundert in dem acht vnde virczigisten iare am dinstage sinte Bernhardis tage.

Nach dem Orig. im Rathsarchiv zu Pirna. Das an einem Pergamentstreifen befestigt gewesene Siegel ist abhanden gekommen.